



旅燕集序

歐楨伯將之燕訪余汝南郡中乃謁
何仲默祠尋李獻吉河上艸堂遇謝
茂秦于鄴下居燕吳明卿至與游余
以待謫公車讀其旅中集將序之未
遑也其為江都文學王元美過之有
浮淮而為之序所傳宗子相輩十先
生則李于鱗過而序之比入金陵采

世宗故實有輶中集序則介紹于汪伯
玉當余過之請曰大任不敢忘羈旅願
大夫毋忘公車余其何辭于燕夫自召
伯啓封雖為天府之國以召南名者率
江沱之間為什而其遺風徒雄于戰
國說士有蔡澤之屬蘓秦鄒衍為旅
策士有郭隗之屬樂毅劇辛為旅遺
辭往之可觀其詩固亡聞也今多悲歌

之士盡自衛荆卿始然其所過固有目
叱之者矣獨燕有處士先生善之他
則狗屠擊手筑之流与和歌市中相樂
為酒人游耳其歌于易水為變徵皆
垂涕泣為羽皆瞑目髮指冠此俠風
也此鄙類若此矣漢僅有韓博士詩
而淮南生受之唐後漁陽上谷悉胡
虜鞞鼓之音至為遼金元所都中一

不幾絕響乎故雖

明興士由明經貢闕下游說之策既紬
亦垂百年乃興李何為之倡三河齊
魯及江淮以南和之而燕乃有聞蓋
旅者盛矣至于南海去江沱益遠當
世宗末梁公實黎惟敬以旅燕名今有
楨伯沈深好書盡與賢豪長相結不
讓于荆卿顧鄙其劍術不講而所過

傾蓋者衆以善聲詩講業于學士
先生其委蛇嘯歌庶幾名南之風乎
嗟夫今列國不貢詩既得士如楨伯使
登黃金之臺而居碣石之館宮商
協作則雅頌可興乃為博士以詩文教
列國竟栖之旅人耳其於楨伯何哉
幸

主上明聖二三大夫方脩雅頌之業而召

楨伯者或有矣

隆慶六年歲次壬申

賜進士出身奉議大夫雲南布政司

左叅議吳興徐中行頓首撰

旅燕集目錄

卷一

五言古詩

二十
五首

七言古詩

二十
五首

卷二

五言律詩

一百
九首

五言排律

一十
二首

卷三

七言律詩

一百
九首

七言排律

一首

卷四

五言絕詩

十三首

七言絕詩

七十
四首

旅燕集

嶺南歐大任偵伯甫

五言古詩

初去故園

出身本田夫家貧無負郭蚤從鉛槧勞尚乏霸王
畧躬耕歲頻荒轉販力猶薄饑來每驅人謀祿心
轉忤謬為鄉里推遣詣太常學脂車已在門逝將
別林壑躊躇不能行執轡前屢却上懷高堂歡下
顧同生樂雖歎三釜養幸可事傭作媿謝棲遯賢

黽勉游京洛井臼付妻兒且當厭藜藿夙昔邴生情寧終戀人爵

望雪浪閣寄羅太史

進帆文江曲江水清且漣水宿倦歎往巖棲久無緣倏經雪浪石問訊飛霞前臨清敞高閣偃息羣玉仙標以棲霞館帶以種秫田簪笏謝金馬衿佩隨青氈茲邦古安成詩書聞誦弦人倫有師表風教伊誰傳余夙企明哲末由覲高賢徒望縣車里會覽削竹編堅臥足鎮俗捷徑難自全寄謝山中

人歲暮懷靈荃

送李伯承

四首

朝陽耀高樹光風汎崇蘭三春豈不榮雷雨將摧殘之子好奇服蘭荃被纓冠芳馨詎自藏剪伐良歎難寸心葵藿前中遠雜茅菅浮雲爲之陰白日爲之寒歲徂上林苑移植丘與樊歲華感我心搖落增長嘆

結束事行役京洛辭豪遊朝發盧龍下夕見黃河流飛泉灑濠梁高漣望馬丘淮陽豈云遠臥治亦

國風音集 旅燕和卷之一 二
已優寧厭承明廬補郡非所求君恩曠浩蕩毋俾
赤子憂禁闥雖可戀疲瘵待爾瘳賜召行復來肅
穆瞻宸旒

良會不可常雜英滿瑤席四座藹冠簪夫君獨遷
謫伊余承末交綢繆暫昕夕未罄歡豫悰遽慘關
山色關山去何之繁憂未能釋揮袂自此分居人
轉悽惻

臨岐重踟躕四顧驚颺來偃蹇寄薄遊鬱結何由
開河梁一分手鳴騶已相催落日照古堤行子心
悠哉北瞻金馬門東倚秋風臺駉駉懷往路太息
仍徘徊絳灌本不怒誰遣賈誼哀五陵紈綺間焉
知楊馬才君其慎自愛千秋重玫瑰

十四夜元白惟敬見過

曖曖天宇豁涼夜皎如練鏡彩未盈規清輝遠彌
見先臨太液池却麗昭陽殿須臾出漸高歷歷指
燕甸零露浥金莖嚴更促銀箭登樓枉嘉賓鳴佩
總時彥列坐引濁醪行厨媿豐膳游豫靡沉酣談
笑事筆硯盍簪旣非偶明德夙所眷共舒南渚情

寧美西園讌撫景豫持滿稱詩戒側弁鄙劣謝久
要期爾迴光眄

十五夜遲元白惟敬翫月

昨遊有餘興今賞不可忘況當圓景麗秋中氣清
涼池沼浩澄澄城闕鬱蒼蒼披衣坐前楹瑤空已
飛光凝華映連觀流輝明洞房周除覺冰淨達道
彌天長步檐幾延佇呼童掃中堂石几拂琴瑟鄰
家謀酒漿夫君幸伊邇策馬非異鄉懷賢切饑渴
皎皎恒相望願從聆徽音示我於周行

十六夜述懷示元白惟敬

登高頰層城遠盼窮燕粵東窺滄渤流西撫太行
碣輪光出海隅浮雲斂天末徒倚眺京師控帶盡
冀闕迅颺度隴阪萬里霜氛滅塢笛應鴻鳴關柝
隨砧發幽燕多慷慨趙魏負勇決李牧出鴈門汲
黯入禁闥昔人遘運會題拂多引拔謬予困泥塗
棲遲歎鬢髮且忻免負薪敢復望結襪芳華寧久
妍精誠誰能察弦望信有常虧盈不堪詰迢遙思
美人明璫似秋月勞悃詠四愁并寄雙魚札

送姚元白

煌煌漢業盛雙闕何頡頏侯門半金貂七貴黼繡
裳北里富歌鐘南隣奏絲簧驅馳走馬埒遊戲鬪
雞坊君來入鼎門彈冠厠朝行肅事禁庭間杼藻
翰墨塲三年厭羈繼請告還陪京陪京禮樂地珮
玉鳴鏘鏘衣簪榮舊秩親昵洽故鄉朝趨典客署
夕臥中林堂執戟豈云疲頌酒殊未央夙昔恥繁
華於今適徜徉揚雄雖寂寞樂志在文章達士有
高軌去矣遙相望

送大司空蔡公考績還畱都

帝世穆清夷皇澤播膏液二佐資牧鴻九官讓夔
稷司空翼 聖朝獻納黼辰側精義密言詮揆文
祭邦式浚衷秉靖寅補袞自恭職二京頗均勞入
奏虞庭績勤事旋舊都秉鈞待崇陟予本澹蕩人
謬厠章縫迹堂上察然明車下憐齊戚洵美緇衣
情自愧乏明德方承倒屣驩已奉脂車役商飈捲
秋蓬須臾易離隔何因奮南圖願托扶搖翼

召試皇極門作

雙闕中天起宸居控華夷卿雲薄前殿下建五丈
旗賜召入銅龍延引牧豕兒冠簪左右列侍從紛
臯夔衢室下清問爰采芻蕘辭自顧雕蟲技豈有
青雲姿結髮願事主委身及明時上書幸晚達穎
脫亦在茲負薪暫已釋交戟容逶迤衮職自無闕
紹繞將奚爲且因四門闢思以答周咨千載有良
謨毋遣曲學譏

秋夜二首

秋風西北至河漢橫中天他鄉況久居游子私自
憐蟋蟀鳴且淒鴻鴈何翩翩嘆息夜中起攬衣白
雲前故人一尺書關山邈以綿寧當如參商別離
多盛年攜手思行游何時早歸旋

颺颺丘中桂淒淒阯上蘭芳馨詎能久北風天已
寒蕭艾非所寶豈置珩璜間結佩遠莫遺徘徊望
雲端憶與君別時明月缺又圓君心妾自知妾期
君不還嚴霜迫中閨自理素與紈何因逐黃鵠一
至鴈門關踟躕盼雙星盈盈增長嘆

冬日 聖駕幸萬歲山茶賦

國朝詩集
卷之十一
會稽昔受計塗山會合符
皇覽遵時豫宸遊協
前謨肆瞻萬歲山奠彼玄武區上冠青霞嶠下澄
碧波湖絳氛久磅礴苑中得方壺卜館築祈年議
禮齊魯儒季冬朔云吉樂歲歡以愉駕出卽伊邇
警蹕先傳呼勾陳伏嚴衛招搖備前驅旬始建曲
旃天狼奮威弧馭風六蒼虬望壇儼龍趨天童奉
蒼璧玉女持金爐英韶合九奏歌筑延以歛封泥
瘞玉簡白雲起須臾回盼秦漢轍馳騁萬里途何
如格羣神行不役千夫霈澤答玄穹望幸勞東都

升中舉盛典永垂皇家圖

答成仁卿

風林遠冥鴻凍澤沈修鯉洛陽三日雪袁生未能
起誰能除逕來忽覲楚成子褐衣翩翩行聲名在
人耳江漢夙蘊靈荆南富榷梓騷辭啟屈平丘索
聞左史子也纂前緒紉蘭襲芳芷秋風吹洞庭北
征戒行李憐予濩落蹤顧笑長安市意氣契遠遊
扶搖大鵬徙投贈英瓊瑤置之石上几嘉藻溢華
光深衷析玄旨得雋歡盍簪並驅肅遐軌願謝囂

歐虞音集
旗幟和卷之一
塈緣鸞驟自茲始

贈通政鄒公

二華表秦京殺函控天府黃河從西來汨沸皋蘭
澣祥秀鍾國寶炳靈篤皇輔鄒公冠惠文枚卜授
齋斧按章伏青蒲請劍誰與伍日月方麗天堯舜
今 聖主崇獎骨鯁臣讜論播朝宁四岳咨納言
帝曰予命女濟濟夔臯列肅肅鷓鷖羽天球並瑀
戈金鏞協南呂忻逢陽道升衆羽各翔舞有滄出
寸雲淦淦九州雨高木以鳴嚶周原沃而撫吹萬

滿太虛春令待公舉平格壽在天侑歌酌吾醕深
馮 高廟靈台階卽延佇

送吳明卿四首

浮雲聳雙闕阿閣扶中天洛京朝諸侯冠蓋紛其
間之子赤麟符握手惟古懽日暮出長樂城南恣
游盤命侶前進酒朱瑟迎風彈千秋一綢繆思駕
雙飛翰

嘉會不可常綢繆爲君結賜金豈不榮而戀河梁
別樂哉新相知倏忽已燕粵萬里風與波羅惟有

明月

明月更弦望鴻鴈知涼暄翩翩多北飛胡爲獨南
轅君自臥治之寧薄武夷山翩翩其漢公卿誰遣君
彈冠闢門咨四岳乘時當來還

行行奉明詔還來待軒車夙昔戀禁闈言返承明
廬那知斗酒歡不得長相於騷裏游中原詎能顧
駑駒結佩與我期蘭蕙秋何如佳人南以北慰我
尺素書

送吳約卿四首

松柏附以蘿浮雲戀清波萬里遠結交三歲日已
多何爲雙黃鵠分飛山與河豈無盈觴酒對之不
能歌中心愴離居徒倚將如何

河畔青青草征馬爲君秣馬亦顧其羣詎能與君
別關山邈以長咫尺難可越攜手立斯須燕婉已
離閣風吹吳會雲何由到京闕汀洲采蘭苕及此
芳未歇

美人好衆芳歲久香不息持以結交懽時節倏已
易幽蘭有本性終風竟何益白日照江皋秋耿君

國朝詩集 卷之一 九
應識夙昔奉周旋誰能置其側贈君遂與環因之
共朝夕

別離日已遠江流悲客心在近恩易洽在遠思彌
深高足豈不策赫奕人所欽於昔凜威稜豐澤沛
自今所貴崇令德鼎足力可任鷗鵬志萬里焉能
計飛沈扶搖以爲期矯翼青山岑

七言古詩

廣武吟

晨登廣武山蕭蕭古戰場徘徊京洛間日落盼榮

陽秦鹿昔奔走中原共翱翔項王氣扛鼎叱咤重
瞳光江東提八千獨伯諸侯王沛中赤帝子入關
約三章燒棧定咸秦蜀租給軍糧戍皋跳玉門引
兵食敖倉相與臨廣武鴻溝竟分疆追擊過固陵
雌雄頗低昂垓下楚歌聲騅逝虞亦亡漢業定關
中乃公畱未央千年繫馬樹此地悲風長君不見
沛公入關秦嬰走東井煌煌五星守蛇分雲聚徵
靈久新城遮說兵縞首烏江不渡馬童來亞父何
勞撞玉斗

梁園歌

汝南太守來送別勸予一訪梁園雪今朝始渡黃
河流登臺忽見梁園月魏王雄都大梁野信陵公
子曾停馬屠肆空聞力士名夷門不見抱關者孝
王宮闕在睢陽連屬平臺複道長兔苑山高成百
室旌旗警蹕回三光檀欒修竹今非故勝事空餘
枚馬賦後巖鴈池曾在無鶴洲鳧渚知何處莽蒼
荆棘古城隈汴水東流去不回千年李白與杜甫
此地曾經醉酒杯荒烟落日一灑淚悲歌撫劍空

徘徊明興古文誰第一共推此地李獻吉信陽何
子曾並驅蘇門高生亦其匹一時酣詠梁王臺人
稱甫白與鄒枚我來更在何李後持觴三酌霑襟
袖天球河圖可終古朱弦疏越竟一奏當年達宦
總丘壤爾輩大名同宇宙此物應難論簪組斯文
未墜憐雕鏤梁園歌歌正愁明月平臺似雪浮遙
寄汝南徐子與知予獨嘯梁園秋

望蘇門山長吟

我行殷墟鄘衛間訪古一望蘇門山濯纓思向百

泉上悲風落日流潺湲蘇門先生久韜耀土窟隱
居睨嵩少嵇阮叩之嘿不言下山回首聞鸞嘯嘯
臺隱隱白雲層本末披烟正可憑青史百年書巧
宦徒慙柳下媿孫登竹林七子沈酣處空有山陽
懷舊賦拂衣便可巢雲松芒屨桐帽吾將去雪簔
道人期我遊弦琴讀易蘇門秋早向浮丘知相鶴
幸從莊叟悟犧牛

銅雀臺歌

建安西駕轅轅道二京舊跡忽如掃鄴都踞虎當
塗高傷心千里青青草英雄蓋世漢征西叱咤山
河落日低左開朱邱詞臣宴右指金戈壯士提中
天銅雀何年築岌堯二臺更相屬講武城連官渡
口滏陽水遶漳河曲雄圖短日祗堪憐斷履殘香
滿目前總帷井榦含啼處空向西陵灑墓田蛾眉
曼睩娛清夜陸機已弔荒臺下美人歌吹詎堪聞
賦詩橫槊何爲者登臺可望華圭宮往事紛紛似
夢中只見孤鴻向嵩洛咸陽千樹盡秋風

賦得蓬萊山送王舍人赴謫

國風音集
卷之三
三
縹緲蓬萊山乃在渤海東黃金以爲闕白玉以爲
宮仙人可望不可至渤海冥濛天地中海風引船
却復去珍禽玉樹紛何窮秦皇何處鞭石來欲過
東海觀蓬萊徐市一往不復返大藥長生何有哉
漢武亦禱萬里沙方士羽客列如麻泰山梁父竟
封禪矯首青天惟紫霞飛僊窟宅云在此往來霧
蓋雲旗裏右揮若木左扶桑波濤洶湧三萬里豫
章王生真歲星綠髮赭顏雙眼青曾是玉皇香案
吏朝夕侍從趨彤庭九枝燈前王母宴誤持金醴

傾銀餅玉皇一笑羣真怒竟麾羽翽乘雲輶王生
自昔有異骨豈合燕雀同飄零謫居猶是蓬萊島
九點齊州連杳冥玉皇恩深再稽首歲許絳節朝
宸扃笑翻東海挹北斗拜祝玉皇千萬齡斯時我
或騎騾駟翱翔雲中瞻玉几相逢把袂問蓬萊何
當贈我金鵝蕊

三河水

三河水萬軍淚淚滴三河水不流胡笳吹落薊門
秋河水流不住胡笳過何處誰使十年來移營兩

屯戍君不見胡騎已馳墻子關漢軍尚哨熊兒峪
防通州

護倉糧高築墻兵馬急趨潞水傍東南芻粟積如山
百萬軍儲指顧間廟堂勝算在兵食一夕通州
幾報還忽憶先朝于尚書計焚積聚將何如不見
漢家飛輓速寧如西據敖倉粟糧餉足社稷福萬
年周曆今可卜

邊兵來

邊書昨日至人望江總制邊書今日聞人望馬將
軍胡塵早暗沙頭兒墻子嶺邊胡馬飛爺孃婦女
急收保大男挽馱孩牽衣襍被裹裝束煤荻顧引
馬騾雞狗豨都門列卒呵行者雲擁催兵快騎歸
司馬授鉞司農餉輦金縣爵軍中賞兜鍪李郭一
時來都人收淚手加顙勞苦邊兵膽力麤雨雪滿
甲冰滿鬚半彎繁弱仍吹蘆誓取賢王掃休屠捷
音入天語呼大同乎宣府乎火影已卜夷虜逋日
暮千里殺氣孤帝將授之金僕姑更爲國家西擊

胡

嘉靖癸亥
十月事

俠客作

君不見燕中高築黃金臺樂生慷慨從西來揮戈
談笑聊憑軼七十齊城何有哉君不見荆卿擊筑
飲燕市悲歌變徵聲出祖臨易水督亢圖成樊首
函西入秦庭觀玉几又不見夷門翁屠肆兒抱關
鼓刀知是誰一朝竊符與公子邯鄲從此驅秦師
古來俠者此數君叱咤萬里生風雲借身報仇不
足道持危排難寧論勳思如鷗鷖霜空肅氣似驂
騮霜坂逐自堪鳴劍馳伊吾誰解校書向天祿君
不見東方先生待詔時三冬文史無不窺徒誦四
十四萬字寧似衛將軍救羊之尺箠僕也落魄長
安市頗識中原豪傑士只今匈奴犯邊鄙四郊多
壘誰之恥便請橫行沙漠裏豈令飲馬雍奴水朔
風夜吹紫駝耳旄頭不見三軍喜登壇推轂更誰
俟酒酣耳熱可以起左執干戈右弓矢爲縛天驕
報天子

送吳約卿西巡因訊張廣平助甫

金鞮玉勒青驄馬繡衣直指稱使者薊雲滿地朔

風高一杯酌別都亭下憶我逢君意氣真燕臺楊
柳尚殘春此日將軍無揖客此時丞相未留賓碣
石舊宮成馬廐華陽高館摧荆薪君能置我門下
走憐是風塵骯髒人昨者按節過三輔每稱廣平
張助甫鼎釜誰能廉潔如文章更見風格古雖然
慘淡違世情獨有芳馨在詞圃翩翩雄視百代前
驂駟局促心空苦俯仰乾坤又一時萬方王道正
清夷公卿喜上推賢疏郡邑多傳樂職詩君行再
出趙魏間攬轡應登馬服山澶淵西望黎陽渡瓠
子東障金隄關長途魍魎知相避負弩前驅或一
攀憐才此去仍推轂爲我問訊憔悴顏馮唐歸日
逢停輦肯薦雲中魏尚還

雪夜曾繕部邀飲遲吳侍御黎秘書不至卽
席賦長句得孤字

狂夫作客遊燕都卜居亦在城南隅侯門懷刺不
解趨頗笑阮藉悲窮途故人爲郎調絕殊荆玉出
璞今方須憐才稍惜南海珠豈有照乘堪前驅深
更遣迎走宛駒從以貂帽雙胡奴明月在裘雪在

鬚開筵獸炭紅滿爐宜城有酒不用酤雕盤絡繹
出中厨高情卜夜且歡娛黃金那問有與無城頭
吹角驚棲鳥酣歌更勸傾百壺竹林二客寧得俱
賓主能飲興不孤青驄御史芸閣儒何如高陽之
酒徒他宵良會尚可圖開尊莫惜招狂夫

黎秘書席上贈李少虛之官赤巖

長安臘月送行客雪中命酒秘書宅客行路出八
閩西贈言豈有繞朝策前年島奴猶未平郡縣紛
紛皆甲兵巖前吹角邊軍集城上鳴鐃老將行島

奴今已悔禍久閩中咸奏凱歌聲客爲南海李少
虛謝家之親黎秘書請纓豈是抱關吏佩印那辭
乘傳車風塵止可樹勳伐今人古人何不如吾聞
桐鄉朱邑本嗇夫陽夏黃霸曾遊徼客行上馬須
早驅慷慨豈道功名小

王母歌壽黎母太夫人

峨峨天上三珠宮琳庭貝闕交玲瓏扶桑若木生
西東朱光反射銀漢側青雀翻飛明月中槭書咫
尺報蓬萊王母西從瑤水來戴勝之冠切雲笄珣

玕雙佩秋蘭裁青娥三千不可以約畧後先婀娜
紛趨陪烟輶電轂一時集手翳瓊枝胡至哉斯時
琪花散空碧綠幢卒葆忽生色棗熟如瓜宴瑤席
吸沆瀣兮食紫虹左流霞兮右金液雙成指顧三
千娥迭歌侑酌觴不息須臾又轉絳節朝天津兩
旗河鼓遙湘妃和神起陽瑟秦女按節來吹簫鸞
匏鶴笛合九奏電裳舞袖迴風飄南岳夫人笑相
邀麻姑赴會不待招武夷曾孫歌且謠羅浮仙峰
四百三十二青玉爲壇鐵爲橋王母來往常逍遙
飛雲我憶蓬萊閣兒時迎拜驂黃鶴玉箱欲紀王
母年金門且問東方朔

蘇子川席上觀舞歌

燕京九月霜花落蹇驢夜走城南陌請謁難窺許
史門邀懽獨造蘇卿宅蘇卿薄祿有清醕西臺御
史爲上客玉觴引滿炙肥羊自稱無以娛賓樂須
臾紅粧立帳前激楚結風舞交錯扇開衫影亂明
霞帕掩釵光薄金爵鬢雲百轉匝花鈿舉袂飄裙
忽欲仙釧邊露腕雙雙玉毯上行塵步步蓮應節

國朝詩集
旌旗和卷之一
七
低鬟依促拍逐行揮翟入繁弦行雲送曲那能住
曼睇橫波誰不憐金吾將軍笑頻顧秘書先生日
猶注胡髯山人俠者流耳熱酣呼亦豪舉持觴將
炙柰樂何馬躍雞鳴不知曙巴渝迭舞白紵歌主
人壽客金叵羅西臺痛飲仍大爵蘇卿膝席情更
多卿也起家曹濮下嚴親尚書號橫野秉鉞雲中
節制遙驅胡漠北威名大絳侯世業有亞夫穰苴
兵法傳司馬君不見東山飲酒賭墅人蘇卿爾豈
沉酣者

贈薛子熙兼柬杜青州

君不見陶公不能謁督郵君不見李白願識韓荆
州嗟君結交二千石古之杜母今君侯君侯佩印
牧青社桑棗萬家春滿野羔幣繽紛聘士人中和
宣布勞謳者聞君下榻郡齋時多暇登樓日賦詩
不署議曹叅府事但隨上計朝京師燕山嵯峨雪
三尺燕市酒徒共朝夕君侯召對將有期門下竊
譏客無益君不見王生嗜酒一何能渤海片言漢
帝稱卿寺今須賢太守知君不愧水衡丞

送黃定父赴雲中謁張中丞

漢家西北雲中郡大漠蒼蒼鳥飛盡代馬風沙遠
斥邊秦人榆柳因成鎮紇干迥隔鴈門高句注斜
連稠陽近何年三築受降城單于射牧今誰問烽
火曾照甘泉宮幽并亦在胡塵中君王撫髀思頗
牧璽書夜冊將軍功山東才人近開府帷幄運籌
似其祖絕驅區脫靜蘆笳盡日轅門寢鼙鼓黃郎
任俠二十餘手持一尺司馬書西投開府獻奇策
分庭願作諸侯客燕郊去騎嘶春草狐白之裘紫

貂帽邊風二月吹馬倒一川碎石飛如掃楊六寨
前人跡稀陰山何處飛狐道七首腰間照雪光檄
成楯鼻不可當班生早勒燕然石歸來典秘蘭臺
郎

石湖歌送韓員外請告還山

大江五千里草堂雲氣孤前揖茅君山下瞰石臼
湖湖上之居今幾載韓君少小曾擊汰乃公謝郡
持一竿來往溪翁釣船在桃花吹滿舊磯頭白鷗
渺渺滄洲外君從獻賦入明光六載尚書水部郎

長卿壁立能文賦，曷倩陸沉稱酒狂。昨者睥睨長
安市，結交稍得天下士。不能訾咤貴客前，獨解酣
呼衆人裏。省署蕭然退食時，夢飛半落石湖水上。
書請急覲，乃公錦帆三月過江東。加餐鱸鱖烟濤
上，高枕圖書雲霧中。君去莫誇湖上樂，拂衣我亦
尋幽約刺船。便可繫籬門，白浪高於瓦棺閣。還家
綠髮意何如，只恐鳴騶促使車。誰談安石東山事，
自有司空城旦書。

松洲歌

主人家世執金吾，不數漢時馬子都。朝從鹵簿甘
泉駕，夕奉期門騎衛呼。洲居豈是列戟處，松塵非
供折腰具。受爵幸免大夫封，論功欲倚將軍樹。興
在青丘巖谷間，高堂倏見徂徠山。掃花食實自堪
老，聳壑昂霄誰可攀。紫霧濛濛團蓋滴，翠濤瑟瑟
長空激。龍榦旁飄金闕門，虬枝低拂滄池石。遙思
海上鳳麟洲，羽駕招搖玉樹秋。何時君挾僊佺去，
我識金門萬戶侯。問君冠劍奉朝請，何似天風灑
吾頂。好將忠藎答昇平，人間亦有陶弘景。

送稷山王簿兼寄謝山人

武安王生謝公侶逢人每道四溟子經笥曾攜隆
慮山褐衣傲睨長安市同時淮上有吳生茗雪爲
丞色不喜王生作簿向稷山大笑各行其志耳稷
山遠在汾河西太岳中條與絳齊保障繭絲堪一
試鳳鸞枳棘且安棲王生祿米薄升斗醉後謝公
詩滿口車行上黨近青天先訪謝公一攜手何門
今曳鄒陽裾當壚豈賣臨邛酒高歌但擁如花人
刀環昨寄漳南否歐生海上欲歸時停雲爲道最

相思絳帖紫參難遠致秋鴻須寄謝公詩

劉子脩歸湖上居贈以長句

射陽湖上烟樹多濁水奔流江作波邗溝西北入
淮去一夜秋風渡漕河竹西歌吹何年路廣陵回
首瓜洲渡胥涇不見浣沙人叅軍只有蕪城賦真
州昔與譚生遊門下每稱劉子脩曾揖長桑傳肘
後還能滿壁畫滄洲前年擊筑過燕市昭王臺邊
遇劉子揮毫命酒見平生薦引無人解知己丹青
傳色出董源晚於山水師荆關猶恨壯觀未極意

跨蹇從我遊西山風吹柳花滿京阪忽憶射陂春
已晚公卿投轄不可留買舟直向湖南返到家稚
子候門庭湖上蘆黃楓樹青行持西掖裁書筆歸
注東臯讓酒經我畏東華軟紅熱木門琅倉不堪
謁長吟左氏招隱詩尋爾持竿釣湖雪

燕京篇

萬年天府國佳氣滿燕州錦繡三千里金銀十二
樓微閭作鎮連恆岳太行蒼蒼盡幽朔環流瀛海
入扶桑襟帶滹沱出新瀆海岳效靈符帝曆象緯

分明拱辰極縹緲天中玉殿高岿堯漢表金莖直
千官朝謁建章宮燎火光中望六龍詞客麒麟爭
獻頌山人芝草亦輸供春日雞鳴宮鑰啟春花吹
入千門裏垂柳清波漲御溝疎槐夾道通官市列
署周廬若散星九衢走馬如流水朱輪翠幃過何
窮繡戶雕櫳對相起觀燈鬪草競繁華芍藥開時
萬樹霞銀缸照夜金張宅寶檻移春許史家塵逐
妖童九華扇蝶迎倡女七香車百壺芳醕歡新曲
千疇嬌鶯度落花嬌鶯啼向歌屏上平樂新豐慣

來往誇胡未詔長楊游承恩曾謁甘泉仗此時
至尊在西苑闥水蓬丘開別館禁籞青烟曉色濃
宮池黃鵠春波暖通天臺峻出層城五色玄都絳
節迎仙官法籙隨輿度侍女香爐傍輦行鸞輿玉
輦萬靈朝西望明庭亦不遙九霄青鳥年年至八
駿瑤池日日邀蒼龍願捧軒轅馭崑崙更接崆峒
路一聞八伯白雲歌不羨相如大人賦

春遊曲

長安大道縱春游燕草萋萋滿御溝西山半似終
南色太液還如渭水頭太液流澌已三月西山絕
巘猶殘雪綠樹遙連五鳳樓彤雲淡護雙龍闕秦
川公子玉驄嘶半醉章臺日未低挾彈呼鷹熊館
北揮鞭飛鞚灞橋西芊綿紫陌華茵細窈窕青樓
絃管沸賞勝俱邀俠客來騎迴暫向倡家繫倡家
少女豔神仙紅杏齊開花滿天鬱金香裊芙蓉帳
琥珀杯行玳瑁筵千迴送酒銀瓶滿一曲當樓明
月轉鸞笙鶴笛引宵長繡簿錦屏障春暖歌翻子
夜更悠悠舞罷霓裳樂未休古調暫更新水令新

歐陽文忠公集 旂常種卷之一 詩
腔又過小梁州爲君酒浣春衫袂爲君笑解羅襦
帶不惜儂家羞展看怨箇人太無賴春花春月
冶遊多相攜相引屢經過交疏影裏頻留盼嬌鳥
窻前柰爾何五陵走馬徒能俠西津交珮誰憐妾
燕歲鶯年容易更鴉黃蝶粉殷勤貼十千買笑意
何如百萬纏頭日不虛何事草玄甘寂寞獨憐楊
子一牀書

伏日同文壽承徐子與顧汝和飲袁魯望齋
中聽謳者楊清歌時子與已補長蘆矣因題

此句

蒲萄綠酒黃金卮吳趨越飲多妙詞歌喉復見薛
車子曲譜似傳楊叛兒絕代佳人不易得楚妃堂
上無顏色慣邀文顧兩才人頗驕天目山中客客
去南皮滄海陰浮瓜沈李共誰吟他時莫憶袁郎
詠妬殺尊前白雪音

送余彥綸宰合肥

燕山驛路蟬聲稀薊門關前桑葉飛故人得意鳴
騶去想見閭門迎錦衣廬江小吏來到門雙旌催

駕壘鼓喧舒城館裏不遑食亞父山旁將駐軒西
望鎮淮樓櫓開桐柏之水如絲來少年白晷宰京
縣民得飯稻羹芋魁吠無犬兮馴有雉憶爾行春
過淝水詔書明日下扶風蚤入長安見 天子

華陽行贈王孝廉歸晉陵

華陽館前秋雪飛幽州道上行人稀當年築館人
何在今日拂衣君獨歸蕭條策馬辭京闕關門一
片西山月胡姬葡萄酒初潑壚頭把臂與君別君
爲荆川太史之門生弟子都講往往皆名卿獨守

師說奉大對公孫側目轅固行滹沱河水凍偏早
驛樓官樹葉如掃上有燕臺之衰草下有荆卿之
古道行行旅食不堪陳漁釣江湖且煮蓴子虛儻
遇鄉人薦老作金閨侍從臣

旅燕集卷一



